

東華續錄

同治朝卷十五
卷八十二之八十六

第五冊

東華續錄

同治縣志卷五
藝文志五

東華續錄

同治東華續錄八十二

臣王先謙敬編 臣張式奎校

十一月戊辰朔子湖北陣亡道員徐豐玉建祠○已已諭軍機大臣等穆圖善奏遵旨派員齎送總督關防並克復狄道等處出力員弁請仍擇尤保獎各摺片穆圖善已於十月初六日將陝甘總督關防派員齎送涇州交左宗棠接受惟該將軍甫經卸篆應辦之事尙多著准其刻甯夏將軍木質關防以昭信守除地方尋常公事卽由藩司包封遞左宗棠行營辦理外如遇緊要軍務著該將軍懍遵前旨率同在城文武力籌保衛毋稍疏虞並著督率所部兵勇隨時剿辦不得稍涉談卸穆圖善俟左宗棠到省或由左宗棠派員抵蘭接辦防務有人再行聽候諭旨上年各軍克復狄道州並河州泰子寺汛在事各員弁尙屬著有微勞著准由該將軍擇尤保奏毋許冒濫將此由五百里諭令知之○諭前據左宗棠奏稱黃鼎等軍獲勝甘省驛道疏通以楊世俊等營分路進紮並令黃鼎先赴蘭垣附近擇要安營此時北路情形計可确定該大臣得以進規河州矣本日據穆圖善奏派員齎送總督關防前赴涇州軍營該大臣諒已在途祇受惟念蘭州爲根本重地該大臣接篆後於省城防剿一切事宜自係責無旁貸見在河州等處賊巢林立近偏省垣卽使黃鼎各軍皆能繼進亦不可無人指授機宜穆圖善既卸督篆凡西路軍情及地方應辦事件均覺呼應不靈該大臣能否卽由平涼親赴蘭州居中調度抑一時不克前進先行派人前往接辦或以接辦乏人仍畱穆圖善暫駐省垣照料軍務俟到後再行交替該大臣酌度情形著於接奉此旨後迅速詳細奏聞以慰廑繫近日各路軍情若何黃鼎等軍何時馳抵蘭州劉松山軍在北路辦理剿撫事宜能否漸次肅清仍著該大臣督飭在事將士相機掃蕩迅奏膚功將此由六百里諭令知之○諭河南嚴禁鹽越境侵銷○修山西崞縣城○辛未諭軍機大臣等曾璧光奏普安餘匪闖入安南旋經官軍收復上游苗匪投誠歷久相安各一摺嚴大五旬結回苗各匪復行闖入安南縣城該文武等力戰數月當將縣城克復在事出力員弁准由曾璧光歸入春間收復普安安南兩城案內彙保該撫仍檄令官軍搜捕餘匪務絕根株並督飭地方官將善後事宜妥籌辦理黃荊蔭繳械投誠經署水城通判袁開第督同文武官紳妥爲布置歷久相安尙屬著有微勞准其擇尤保奏仍著曾璧光飭令各該員隨時約束毋任再滋事端將此由六百里諭令知之○諭前因貴州遵義教士因傷殞命疊經諭令曾璧光妥速籌辦並令李鴻章會同辦結李鴻章前派道員余思樞馳往查訪計早抵黔曾璧光諒已派員會辦此案總以教士因何身死爲最要關鍵必須質證明確斷不可稍涉含糊見在法國使臣羅淑亞業已出京赴滬聲言欲帶兵船赴川實因川黔教案未結著曾璧光懷遵疊次諭旨嚴飭委員會同余思樞速將此案了結不得稍有延宕將此由六百里諭令知之○壬申諭內閣

前因左宗棠奏提督劉松山剿辦靈州回匪連獲大捷請將該提督前次失察游匪一案革職畱任處分懇恩開復等情當經諭知該大臣候查明靈州失守情形後再行降旨茲據金順奏稱劉松山到靈州後剿撫兼施見已將州城克復剿辦甚爲得手等語與左宗棠所奏大略相同劉松山向來打仗甚稱得力此次剿辦靈州回匪尤能迅赴戎機謀勇兼備劉松山著准其開復革職畱任處分其前案內失察之分統管哨各官均皆隨同打仗著有微勞著一併免其查參此外出力各員著准由左宗棠擇尤保獎毋許冒濫○諭軍機大臣等前因都興阿等奏覆勸展邊事宜當經諭令該將軍等俟朝鮮覆文日妥慎籌辦並因禮部奏據朝鮮國王咨請於沿江之地嚴禁偷越亦經諭令該將軍等飭屬認真辦理茲據朝鮮國王咨覆奉准江岸一帶酌畱三五十里劃清界限之議請於原野平闊之處劃界稍遠等語著都興阿額勒和布恩錫查照該國王所請在江岸寬平處所酌量籌辦並於屢邊之時將界限劃清仍遵前旨督飭各該地方官遇有游民私墾及滋擾等弊立即密拏懲辦毋稍疏忽以申邊禁而靖地方朝鮮國王咨文均著鈔給閱看將此各諭令知之○諭前因總理各國事務衙門議覆富明阿等奏朝鮮國人往俄界墾地應由朝鮮早申禁令當諭禮部行文該國王妥爲辦理茲據禮部奏稱准富明阿轉據甯古塔副都統咨報琿春協領訥木津奉飭前往摩闊歲會晤俄官面議兩國交涉事件於中途遇朝鮮國男婦四五十人陸續越界均由珠倫河前往海沿問其來歷言語不通因係俄界未便攔阻旋密查海沿嚴杵河棘心河等處已聚集千餘人續投者尙紛紛不止請由該部行文該國王飭令邊界官悉數領回等語朝鮮國民人潛投俄界男婦成羣竟至千餘名口之多難保不愈聚愈眾該國王自應及早禁止庶不至別滋釁端著禮部迅卽行文該國王將逃赴俄界民人飭令該國邊界官悉數領回並由該國王申明禁令嚴飭該國沿邊官弁約束民人毋許再有逃越以重邊防並著富明阿飭令訥木津會商俄國廓米薩爾務將朝鮮越界民人悉行逐回不得久畱俄界以致別生枝節原摺著鈔給富明阿閱看將此諭知禮部總理各國事務衙門並由五百里諭令富明阿知之○左宗棠奏劉松山一軍九月二十三克復靈州城並破四寨一壘十月初二日攻克里仁渠一帶九寨前於摺內約略敘及然未接劉松山公牘故戰狀不能詳茲據牘稱九月二十二日馬化澂復遣漢民解米糧十萬斤來營具保馬化澂永無反覆狀仍不言呈繳馬械劉松山以撫局關鍵首在呈繳馬械今馬化澂仍襲從前故智冀以甘言微利了事非誠心求撫可知察看金積堡東北馬家兩寨楊家寨金何李丁四寨雄峙參錯深壕環繞渠流灌注其中距提督蕭章開劉家營壘五里是夜劉松山傳令各營攜鋤鋤草東四鼓出隊向劉家寨取齊馬步分五路布疊陣銜枚夜行一向馬家寨進一向楊家寨進各支列陣於後以拒各堡援賊比抵

寨前賊始驚覺官軍號鼓齊鳴立將各寨合圍寨上礮石雨下各營擲草平壕揮鋤掘堡併力攻之火器環施飛光電轉天明楊家寨積薪著火煙燄蔽天寨中呼號喧噪壯士乘機猛進一鼓克之馬家兩寨見楊家寨已破恟懼益甚各營乘勝薄之兩寨亦相繼而下劉松山北傳令各營進攻李丁金何四寨察看李丁兩寨地勢低窪溝渠交錯飭各營運蘆葦築壩蓄水灌之未幾金積堡馬步援賊逼至劉松山自督各營穩築壩隄派道員劉錦棠提督蕭章開軍功董福祥分中左右三路擊之提督李占椿李雲貴爲接應提督潘運璋陳宗蕃進左路之左提督彭緒圻譚上達進右路之右各營奮威衝殺賊勢不支折而西奔官軍馬步急追至秦渠邊賊中人馬擁擠橋梁忽斷殿後之賊見水而過截斃溺斃無算餘賊向金積堡遁去各營返旗攻李丁兩寨渠水已淹偏寨脚矣秦賊勢蹙開西門出奔金何兩寨賊眾亦倉皇棄巢鼠竄官軍分支鈔殺斃賊又多餘賊敗歸金積堡劉松山即令官軍分營填駐所破五寨收隊而旋是役計斃斃焚斃回逆約一千五百餘名回目馬玉喜已於堡破時格殺生擒百餘名內有回目馬得三當即訊明正法官軍陣亡員弁勇丁二十七名受傷一百七十一名此九月二十三日攻克劉家寨西北寨壘七座大獲勝仗情形也是日吉林馬隊及雷駐花馬池定邊四營來下橋會師詢悉提督黃萬友副都統雙壽於十六日道出橫城時適探南路有騎賊駛到意似迎抗官軍黃萬友督飭步隊雙壽督馬隊張左右翼迎擊馬賊結數十團猛撲而來氣殊驕甚官軍併力壓擊槍礮刀矛齊進賊敗退迨十五里始行收隊計斃賊二百餘名官軍陣亡勇丁十名受傷十二名劉松山以該逆於竊踞靈州後因官軍未加懲創自謂得計此次仍敢截阻後路之師應予痛剿二十四日先諭馬化澂令靈州踞城叛回速出就撫免其剿辦二十七日馬化澂始具稟來營仍請寬限劉松山知其詐嚴飭之詞靈城賊匪精壯守城並引陝回入城助守其眷屬輜重則已於先日潛移金積堡矣二十九日五鼓劉松山傳令各營裹糧夜起仍分五路布壘陣整隊向靈州進架橋過清水溝行數里時已午刻瞭見城南卡壘甚堅賊旗林立左右野潦縱橫淺者猶及馬腹劉錦棠蕭章開分左右路見水而進劉松山督各路直搗中堅抵城南五里圍圍寺卡各營槍礮仰轟拔去蒺藜架木爲橋踰壕而上克其外卡餘賊向南門外里許之石壘竄遁官軍緊蹙之忽城東塵氣大起突出馬賊千餘向西南馳突意圖鈔截劉松山飭提督余虎恩馬隊擊其左雙壽馬隊擊其右董福祥步隊副之騎賊撲近陣前官軍馬步相依縱橫盪決斃悍賊數十名敗賊折向東南飛奔各營追殺十五里維時劉錦棠蕭章開已鈔近附城之卡壘旁矣城賊開南門出卡拚死拒敵劉松山飭黃萬友周國勝朱德開李就山知州李樹棠奮力圍攻城南石壘自督陶實昇易致中何作霖譚拔萃從中路猛進槍礮環攻雷轟電掣賊勢不支爭入卡門拋棄器械自相蹂踐劉錦棠蕭章

開乘勢奪卡而入敗賊縮退城中各營蹣跚搶入見賊即砍城賊開東北兩門狂竄官軍分道躡之追殺五里天色已向晚矣收隊回城其南門外石壘踞賊二百餘名經黃萬友攻破挫斬無遺是役實斃賊一千四百五十五名生擒二百七十三名訊明賊目馬元生馬致和郭有利正法軍前拔出漢民男婦七百餘人官軍陣亡員弁三十一名受傷一百八十一名此二十九日克復靈城大獲勝仗實在情形也是夜調靈城敗賊踞城東迤南十里之海子墩買家莊十二里之馬清兒羅家橋四寨劉松山雷營駐防親督各營四鼓出隊派劉錦棠蕭章開向海子墩進自督各軍向買家莊進飭馬隊伏左右兩路並戒步隊如未破寨則列隊勿動也部署既定軍士銜枚疾行直薄寨下賊始驚覺中軍擂鼓發號火器仰攻寨上亦礮石雨注軍士擲草掀土填壕而過焚寨門掘堡側四面擁登立將海子墩買家莊攻克該兩寨回逆四五百名悉數殲之其馬清兒羅家橋兩寨踞賊見火光如晝喊聲震地礮轟如雷知官軍已奪海子墩買家莊矣遂開堡門從東南狂竄余虎恩雙壽馬隊左右鈔殺之壓追十八里收隊而還是役斃賊六百餘名生擒四十二名訊畢於軍前正法拔出漢民男婦二百餘名官軍陣亡員弁十四名受傷五十八名此三十日攻破靈州城外四寨獲勝情形也劉松山進城後察看城內倉廩廟宇官廨民廬半成灰燼瓦礫塞道飭黃萬友李樹棠移兩營駐之將節次拔出漢民安插州城設法撫輯一面招徠漢民認產復業初一日自率馬步各軍收回下橋老營營東十里爲里仁渠大小兩寨迤西兩莊迤北里許爲趙家寨迤東二里爲楊家三寨楊家寨迤北三里許爲馬家兩寨賊踞其中劉松山是夜傳令各營四鼓出隊分枝向里仁寨趙家寨進自督中軍相機而動令馬隊伏東南二三里防西南援賊劉錦棠蕭章開抵里仁寨半里守賊見官軍至大寨礮聲起小寨之賊倉皇出巢蟻附大寨各營乘勢跟蹤奪門而入賊眾死鬪槍礮對轟壯士從寨後肉薄而登寨內之賊狂號出奔官軍一鼓擁入寨門敗賊無路可逃有墮牆而殞者有投井而斃者守賊約四五百名蒐薙淨盡劉松山乘勝督各營進楊家三寨令朱德開李就山董福祥圍趙家寨拔之守寨之賊約三四百名僅逸出馬賊數十騎餘悉殲旃楊家三寨之賊見各寨火起開門向正東狂奔陶之昇易致中何作霖周國勝兩路鈔殺之偪入山水溝淹斃戮斃無算餘逆折向東南敗走天色已明忽西南塵氛蔽空突有騎賊二千餘來勢兇猛劉松山派劉錦棠蕭章開督隊進正東攻馬家兩寨自督步隊攔頭迎擊飭馬隊左右鈔之悍賊死拒不退適馬家寨之賊經官軍攻破紛紛出寨亂竄賊眾返顧忙亂亦向西南潰走各軍四路掩殺賊漸步賊三百餘名收隊而還是役共計實斃賊一千數百名生擒一百一十一名內有賊目趙萬辣馬幅意訊畢斬之官軍陣亡員弁勇丁十八名受傷九十四名此十月初二日攻克里仁渠大小八寨兩莊之實在情形也方劉松山之入靈州也馬化澂

來稟靈岡正在出城忽有南來陝同乘間進城焚掠請示遵辦並央派辦撫局之總兵胡昌會請於甯郡五屬擇地安插意在飾其句結之謀不意劉松山九月二十三日被馬家寨時已接出馬化澂九月十三日給偽參領馬三重吳天德楊長春糾黨抗拒偽札一封偽銜刻統理甯郡兩河等處地方軍機事務大總戎馬鈴以偽印其狂悖之狀陰狡之謀已經敗露也陝同陳林馬正和等股及從前雜匪金積堡之鄭保和沙學德等據雷正綰等馳報初七日又經劉松山痛剿勒令悉數呈繳戰馬軍械尚未接據劉松山地報其雷正綰周蘭亭初八日由四百戶馳抵鳴沙洲謂張恩堡東西四堡爲馬化澂先鋒袁希孟所踞初九日兩軍整隊齊進先攻東西依崖兩堡破之斃賊二三百名釋其老幼婦女獲戰馬六十餘匹袁希孟即率西面三堡同眾伏地泣懇收撫願將馬械悉數呈繳雷正綰等受之正點驗問忽見賊騎數百急馳而西雷正綰等列隊堵截賊不意大軍倏至駭懼失措官軍馬步急擊之斃賊約二百名訊擒賊供始知此股即馬正和馬長順之黨初七日經劉松山擊敗者也初十日雷正綰由張恩堡進滾泉進壘水適簡放臨張福齊兩軍東自韋州前來合隊十二日行至強家沙窩擇要分駐秦渠內外距金積堡皆不過十餘里以剿撫機宜未可遙制必事權歸一乃策全功檄雷正綰周蘭亭簡敬臨張福齊所部各營進止緩急次第均候劉松山商酌定奪冀免歧誤又奏前檄補用道李耀南湯聘珍等各率所部分布秦州秦安通渭一帶穆圖善飭記名提督涼州鎮總兵傅先宗總統赦天印喻正祥彭忠國等馬步營扼勦河狄竄賊力顧蘭垣餉道嗣據記名提督梅開泰稟請裁兵節餉臣宗棠當飭精爲挑選併成五營歸湯聘珍節制隨同防剿維時狄河逆賊時以零騎游掠通渭伏羌西和禮縣等境然皆非大股也九月二十二日湯聘珍詞河回蘭入禮境窺伺徽成人數頗多督同梅開泰約虎威營出隊馳剿二十五日行至西禮交界之長道鎮偵賊大隊盤踞西和縣城北三十里之石堡城下寨地方當就地築壘一面令梅開泰率馬隊且探且進步隊繼之抵鄭家堡出山峽賊馬步蠶擁而來梅開泰分營一由右扼山麓一由左扼山腰自率馬步直擣中路槍礮環施斃賊數十名正酣戰間湯聘珍及副將田連考各率所部馳至奮威衝殺騎賊擁奔步賊大潰各軍緊躡之由鶴子坪追殺至王家窯日暮收隊計斃賊三百餘名生擒二十餘名二十六日黎明賊騎數百仍排列峽口似誘官軍深入者適謀報二十五夜游匪嘯聚一千人來禮縣與西河賊合結寨石城堡迤南馬跑泉圍阻官軍進剿之路湯聘珍遂督隊分兩枝緣鄭家堡楊家背頭堡擊之登高瞭見步賊數十團伏峽中飭各營嚴陣以待賊旋引去二十七晚選壯士百餘乘黑夜襲賊營火箭火彈拋入焚其柵卡賊眾慌亂棄寨狂奔二十八日梅開泰率馬隊追過西和縣城二十九日收隊回營方賊之竄入西和也湯聘珍函約傅先宗督同各營會剿初一日傅先宗

抵西和城下遙見馮家莊一帶煙餽彌空策馬飛進賊正圍攻姜席家川堡官軍馬隊從背扎山峽鈔擊賊駭而奔堡圍立解是夜詞賊踞江口刺壩兩處湯聘珍督同梅開泰信道出禮縣截其北竄之路詰朝傳先宗馬步向刺壩追賊至碧玉河突有另股伏賊橫出山谷之旁傳先宗即飭喻正祥督隊分途猛擊賊遂披靡喻正祥追殺二十里至立隄壩傳先宗自督馬步追殺三十餘里至廟兒埡敗賊向岷屬炭廠遁入狄河各軍收隊而還計初一日初二兩日斃賊約近千名生擒六十餘名據擒賊供此股賊目劉四花鄉約馬元和世輔張老五皆西禮叛回糾眾三千餘人流入狄河河州賊目馬尕大助以馬步千餘沿途夥結游勇千餘眾圖襲踞禮縣二十五日之戰馬元已被槍傷訊畢斬之其時道員李耀南一軍已抵通渭馬營監十月初一日調通渭屬李家灣一帶河州回逆磨集攻堡掠糧賊目爲甯阿洪馬洪幅糾合北路敗回由狄道隴西漳縣榜羅鎮竄來約三四十眾初二日黎明李耀南派總兵殷華廷率馬隊前驅自率馬步各營繼進行二十里抵牛山遇賊前隊殷華廷擊敗之官軍追近李家灣賊回旗抗拒分股從李家灣南北兩溝鈔出李耀南率所部緊結方陣分中左右三路應之殺賊二百餘乘勢壓擊追至通安驛敗賊向內官營遁去另股騎賊自北路來援復經督隊擊敗臣維狄河回逆負隅恃險廣行句結此次糾約出巢自係迎護陝回崔三禹得彥敗殘餘黨經官軍擊敗遁歸巢穴臣穆圖善前調傳先宗進規河狄臣宗棠已催令遵檄前進恪遵調遣並嚴飭南路在防諸軍相機堵剿力顧後路又奏據劉松山牘稱克復靈州後詢知該州甘回素聽馬化澂之命地方公事及征收錢糧向皆馬化澂主政在城文武各官薪糧皆由馬化澂發給回眾藐視官長而不受約束官長坐視回眾而莫可如何以致倉卒變生莫能救護前代理靈州知州尹泗其弟藍翎卽選從九品尹湊並家屬家丁十餘口及見署靈州知州甘肅候補同知鍾蘭其子鍾爾規同時服毒自盡前派去護餉之總兵曹如正副將陳明遂辦糧委員副將陳永錫謝明華張福星彭友亮參將張細祿副將王榮華隨去勇丁七名均被戕害當州城未陷之前署靈州營參將馬福守備李繡春州吏目黃廷輝等察知回眾叛形已露約同出城赴營送信求援該參將等復於途中遇賊守備李繡春不知下落此次克復州城即派馬福黃廷輝作爲前導臣維靈州甘回本馬化澂黨夥馬化澂從前名雖就撫實仍以其新教部勒甘回自成一類久之老教亦被其脅服陝甘回民尊之爲自主自稱爲吾兩目蓋同語奴才也其私授偽官有參領協領等名其自稱爲大總戎稱官軍爲敵人狂悖如此見因攻破甘回寨壘搜獲賊中偽文始知其詳劉松山前抵靈州恩恩南下未據該文武稟知逆情將軍餉寄頓城中僅派弁勇十餘名守護以致同遭其難見經官軍攻克州城逆賊殲滅殆盡死事諸文武應懇天恩均照陣亡例議卹馬福黃廷輝聞變出城求援嗣導官軍克復城池

可否免其置議出自 天恩又奏頃接劉松山緘稱因陝回呈繳馬械遲延仍懷回測初七日進剿連破秦渠南板橋馬家兩莊納家三寨丁家兩寨劉家灣子三莊馬家灣子四莊何家兩莊西至蔡家四寨金家兩莊一帶陝回所踞村莊斃賊二千餘名生擒近三百名獲賊眷六百餘口官軍亦有傷亡馬化澹見史署河州鎮總兵胡昌會保其永不反覆並力保陝回悉數呈繳馬械其詳細情形容俟續報到日再行馳奏臣拜摺後即進駐平涼又奏甘肅秦州毘連川陝僻在一隅稍稱完善近年以來協餉之來專取道於此重兵亦翕聚其間其始藉兵力以護餉藉民力以養兵其繼兵增而餉愈艱民窮而寇愈熾臣自率師規隴即派中書吳士邁道員湯聘珍李耀南由汧隴趨秦州會同甘軍隨時堵剿一面諭知甘軍各將領裁併成營以期實濟提督梅開泰首先遵辦裁十營併成五營總兵敖天印繼之察看情形事體尙無滯礙如果辦理得宜未嘗不可收餉節兵精實效特一時乏此鉅款既虞遣撤爲難而主持苟非其人轉恐激成別故斯夕焦思苦無全策適船政提調前護福建巡撫道員周開錫帶解餉銀馳赴臣營臣維甘肅北路中路均有制賊之軍南路雖有穆圖善與臣撥派之軍而彼此勢分等夷各不相下非得治軍之才假以事權難期指臂相聯共襄捷伐見已檄令周開錫馳赴秦州總統諸軍將南路兵事餉事認真整頓 上諭甘肅狄河回匪糾合陝回崔三等餘黨出巢肆擾經穆圖善派傅先宗進剿獲勝左宗棠又檄李耀南等軍敗賊於李家灣一帶斬獲甚多其甯夏南路回匪楊士恭等句結陝回援應納王各寨又經金順張曜督軍迎剿疊獲勝仗剿辦均屬奮勉見在陝境肅清各匪已無立足之處勢必要挾甘回苟延殘喘如能將河狄各賊巢逐一攻破斷其黨援則剿撫皆易得手著左宗棠仍飭李耀南等及前派出之黃鼎各軍乘機進剿毋稍鬆勁一面嚴檄南路在防將士實力嚴防以免顧此失彼穆圖善亦當札飭傅先宗等與陝軍聯絡聲勢迅掃逆氛納王各寨爲回逆負固之區仍著金順會同張曜迅圖攻拔毋任憑險死守阻截官軍左宗棠奏查明靈州失陷文武下落情形請將各員免議等語著靈州參將馬福吏目黃廷輝既據奏稱聞變求援並導官軍克復城池情尙可原馬福黃廷輝均著免其置議其劉松山收復靈州情形與本日金順所奏大略相同該大臣見擬進駐平涼著即懷遵前旨將能否馳赴蘭垣情形迅速具奏回目馬化澹既給馬三三等僞札是其狂悖之情業已敗露而又求總兵胡昌會保其永不反覆並力保陝回呈繳馬械前後兩歧殊難憑信即著該大臣嚴飭劉松山等乘此軍威迅圖掃蕩該逆如實係真心乞撫仍著左宗棠責成劉松山相機妥辦萬不可爲甘言所誘輕率收撫轉送奸謀周開錫既馳赴秦州派令總統諸軍即檄飭該道員將南路兵事餉事認真整頓以資臂助北路剿撫事宜著即檄知雷正綰等與劉松山商推以免紛歧將此由六百里各諭令知之○飭山西添撥月餉一

萬兩濟金順軍○予甘肅傷亡提督易德麟祭葬世職建祠陣亡總兵官楊玉賢副將李大勝等祭葬世職○甲戌飭河南添撥河工銀三十八萬兩○丙子山東在平縣教匪孫上汶等謀逆捕獲伏誅○丁丑諭內閣福濟奏遵議布倫托海辦事大臣請即裁撤仍歸科布多管轄一摺新設布倫托海辦事大臣既經該將軍與奎昌錫綸等相商均以裁撤爲宜自係實在情形著即照所議裁撤所有該城官兵即行撤回其新頒印信即著撤銷索倫厄魯特等處領隊大臣及棍噶扎勒參應辦事宜並奏各件著統歸科布多參贊大臣經理以符舊制而一事權喇嘛歲支茶布銀兩及棍噶扎勒參於一二年後應否與各處呼圖克圖一體輪流年班進京之處著理藩院妥議具奏此次裁撤布倫托海係屬改歸舊制著福濟等妥爲曉諭俾各守分安居朝廷初無歧視毋得互相議論致兵民人等復生疑慮也○諭軍機大臣等福濟奏遵議裁撤布倫托海請仍隸科城一摺所議甚是布倫托海本係科境阿爾泰山一隅之地該處設城後辦理諸多窒礙即著照所請裁撤將新設布倫托海辦事大臣印信繳銷所有索倫厄魯特各領隊大臣及棍噶扎勒參應辦事宜統歸科布多大臣辦理以符舊制海城官兵裁撤後所餘官弁除經手糧餉之員暫留科城辦理覈銷外其餘旗營官兵仍著照前次奏定章程分駐熟河等處綠營官兵情願入伍者亦即照福濟所議呈明口內各營汛以原銜當差隨時酌補不願者亦聽其便但不可逗遛科城致生事端奎昌等務當隨時畱意妥爲經理福濟亦當與奎昌等和衷商酌不可稍存膜視將此由五百里各諭令知之○戊寅諭軍機大臣等曾璧光奏覆陳教務情形一摺據稱遵義府城民教爭鬭業委道員陳昌運馳往查辦先將藉事搶擄之民人傳有沅訊明正法民教悉已解散並將教士三人於六月十三日護送到省七月初七日據代辦主教任司鐸照會趙教士到省後於初六日因傷身死該撫委員往驗而任主教復以業經殞厝未便開棺相驗攔阻至梅教士在仁懷被殺一語有無其事已派員往查等語此案既據曾璧光查明趙教士並非因傷身死該主教又有攔驗情事即可從此設法了結折服其心梅教士是否被殺亦應確切查明見在李鴻章所派之道員余思樞計早抵黔即著李鴻章曾璧光飭令余思樞並該省委員等迅速持平辦理及早結案免致羅淑亞到後另生枝節將此由六百里各諭令知之○綏遠城將軍定安奏嵩武軍會剿南路踞逆攻拔王洪堡等處賊巢得旨著即知照張曜會同金順將納王等寨迅速攻拔以靖逆氛○已卯諭軍機大臣等恩麟奏巡閱後藏起程日期並親歷邊隘妥籌安撫一摺前因廓爾喀與唐古特頗有猜嫌諭令恩麟前往邊界妥爲籌辦恩麟見已定期起程巡閱後藏即赴廓番交界親自禁約該大臣務當懷遵前旨不動聲色於開誠布公之中仍不失長駕遠馭之意以期潛消釁隙邊境又安恩麟啟行後藏中一切事宜即著德泰妥慎辦理毋稍疏虞將此

由五百里各諭令知之○飭直隸等省撥解東三省官兵俸餉銀○廣湖南寶慶府學額三名道州一名江西永新縣一名山東清平七名章邱五名○庚辰以江甯被水允馬新貽奏雷抵徵錢文爲採買倉穀及撫恤修圩之費○壬午諭軍機大臣等穆圖善奏查明靈州降回變亂大概情形並暫委寶型護理安肅道篆各摺片前據左宗棠金順奏劉松山收復靈州情形已降旨將署靈州知州鍾蘭及代理知州尹泗等交部照例議卹並因馬化澂有給馬三重等偽札情事又代陝回甘言求撫前後兩歧殊難憑信諭令左宗棠嚴飭劉松山等乘勝進兵相機妥辦該大臣務當懷遵前旨督率劉松山等軍分別良莠勦撫兼施不得輕率收降致墮詭計左宗棠計已進駐平涼能否馳赴蘭垣居中調度仍著迅速具奏穆圖善莅甘數載熟悉情形見在甯夏防守緊要該將軍既已交卸督篆著將省城防剿事宜布置妥協俟左宗棠到省或左宗棠派員接辦有人即行前赴甯夏將軍本任以重職守所請來京陛見之處應毋庸議所有穆圖善原部各軍均著歸左宗棠調遣甘軍餉項並著該大臣均勻分撥以利師行毋得稍分畛域安肅道員一缺穆圖善見據肅州鎮總兵陶生林稟請暫委四品頂帶寶型護理該員係已革知縣資望太輕恐不足以勝任著左宗棠隨時察看如果不能稱職即行另派妥員前往接署將此由五百里各諭令知之○諭金順奏官軍攻拔賊壘見在進剿情形一摺南路各堡擊攻克後經金順會同張曜督軍進剿將王家燒房油坊寨先後攻拔逆首馬鳴漳擒獲正法惟納王兩寨尙爲賊踞亟應乘勝進攻著金順會同張曜嚴飭派出官軍轉戰而前將該二寨迅圖規復以期次第廓清納家牘匪勢窮蹙覺回目納玉貴等赴營乞降如果能呈繳軍械馬匹捆獻賊黨並與王家噶莊斷絕往來自當分別辦理惟該逆反覆無常金順不可稍涉大意致墮詭謀將此由六百里諭令知之○諭總理各國事務衙門奏請添派立界大員一摺前因布倫托海所屬地方皆係塔爾巴哈台管轄之地所有分界事宜業經諭令文碩約期馳往辦理惟見在布倫托海大臣既經裁撤該處立界事宜即應統歸科布多大臣經理奎昌前與俄國使臣勘辦科布多邊界甚屬妥協情形較爲熟悉著即改派奎昌於明歲春融時馳往該處與俄國使臣將瑪呢圖嘎圖勒汗至哈巴爾蘇一帶逐一查勘會立牌博文碩即毋庸前往其應如何揀派嚮導及指授機宜之處仍著福濟遵照前旨悉心籌辦文碩既補授科布多幫辦大臣此次分界事宜亦當會同商議妥爲辦理原摺均著鈔給閱看將此由六百里各諭令知之○諭前因榮全奏賠償俄國諾海牲畜銀兩請於津海關或北洋三口俄國應納稅餉內照數扣收當交該衙門議奏茲據總理各國事務衙門戶部奏稱此項賠款既經榮全議定俄錢二十四萬約中國銀十一萬數千餘兩除委員陸碧屯已還過銀九千八百二十兩外其餘銀十萬數千兩有零按照原議三年補償每年需銀三萬四千兩自應

籌款今年補償惟北洋三口山海東海兩關並無俄國交納貨稅即天津一關俄商陸運稅銀每年亦止一千餘兩不敷抵扣請於山西應解京餉內分年籌撥等語著李宗羲飭令藩司於山西應解京餉內自明年爲始分作三年每年撥銀三萬四千兩交歸綏道轉解務須提前於每年三月起解四月解到烏里雅蘇台交榮全收納覈計三年共應解銀十萬二千兩於應賠俄國款項有無盈絀著福濟榮全查明辦理原摺均著鈔給閱看將此由六百里各諭令知之○予甘肅被戕縣丞陳聯樹祭葬世職○癸未免科布多所屬本年例貢貂皮○甲申諭軍機大臣等劉嶽昭岑毓英奏官軍收復昆明陽州城並見在分期各路賊匪情形一摺昆明陽路逆楊振鵬因城外賊壘蕩平率黨抗拒提督馬如龍親往督辦楊振鵬意圖脫逃經張保和等設伏圍拏與馬聯魁等一併正法逃竄各匪截殺殆盡其往來逃遁西通賊之馬生龍等亦經獲見在該處漢民均已歸業州境一律肅清著即飭令該署州張啟辰等將善後事宜悉心經理其解往新興呈貢各屬之投誠回人亦著飭屬妥爲安置毋令日久滋事新興軍務雖將逆首劉綱等正法而州城見尚未下仍著劉嶽昭等督飭馬青雲各軍實力環攻迅圖克復省西土堆餘匪並著親督在事將弁晝夜攻取毋任苟延殘喘祿豐激江竹園等處餘逆未平該督等務當嚴飭何秀林等各率所部馳往祿豐會合剿洗一面飭令張保和迅移得勝之師由昆明陽前赴竹園相機剿擊迅殄寇氛其昆明陽出力文武各員著劉嶽昭等查明彙奏奏保昭通一路孔昭鈐等辦理若何唐友耕已否由昭通前赴省垣該督等當懷遵前旨妥商調度並將昭通一切事宜及早籌辦用靖邊陲將此由六百里各諭令知之○丙戌諭內閣醇郡王奏請整肅功令以杜專擅一摺據稱領侍衛內大臣向無歸宗人府管轄之例自惇親王補授宗令臚列直班新章多條奏准通行且將領侍衛內大臣直班推班亦令一律呈報藉整頓之名敬攬權之漸且查操應否推班及領米日限自應推班亦未載入章程殊屬遺漏請將新定直班章程特派王大臣重加刪定等語惇親王向來辦事間有意氣用事不能詳慎之處若如醇郡王所稱藉整頓公事爲名施竊弄威柄之術諒惇親王亦斷不敢出此醇郡王措詞過當殊屬非是著傳旨申飭惇親王醇郡王同爲國家懿親情聯手足總當以敦睦爲懷不得各存意見至王公直班本有舊制可循所請特派王大臣重定章程一節不特摺內所稱看操領米各事挂一漏萬且亦徒事紛更著毋庸議宗人府前定直班章程日久不無窒礙亦著毋庸置議嗣後應在內直班之王大臣等遇進班之期如有藉詞推諉曠誤不到者一經發覺定當遵照嘉慶道光年間歷次所奉諭旨嚴行懲辦決不寬貸○官軍復甘肅靖遠縣城○于陝西殉難知縣賈敬修祭葬世職○予甘肅傷亡副將穆隆阿祭葬世職○己丑諭內閣前因丁日昌奏訪查營弁人等滋事釀命當經降旨將遊擊薛蔭樸都司丁炳先行革職交

馬新貽親提研審按律懲辦並將丁日昌交部議處茲據該撫奏稱續查案內有伊姪監生丁繼祖同往開闢先同並風聞伊子分發知府丁惠衡一併在內經署臬司杜文瀾督審稱伊子並未在場請將丁惠衡丁繼祖分別斥革徹底根究並自請革職治罪各等語此案營弁人等滋事釀命丁日昌之姪監生丁繼祖既經同往著即斥革交馬新貽歸案審訊伊子丁惠衡是否同往著於到案時一併交馬新貽審明虛實分別辦理丁日昌咎止失察前已交部議處所有自請治罪之處著毋庸議○庚寅諭內閣曾國藩奏堵築漫口合龍暨疏濬中洪下口均屬穩固深通一摺直隸永定河本年北四下汛漫口經會國藩飭令道廳各員設法堵築見已合龍並據該督勘驗北四下汛暨南七兩處壩工均各穩固張家墳一帶所挑中洪南七以下所挖引河並能暢流無滯在事出力各員著准曾國藩擇尤保獎毋許冒濫嗣後仍當督飭該道廳等認真挑挖並隨時修治隄埝俾保無虞○諭前諭曾國藩察看臬司史念祖能否通曉刑名足資表率據實具奏茲據奏稱史念祖心地明白器局開展論事亦尚有識惟直隸刑名較繁該臬司資望尚淺著調刑名稍簡之省磨厲數年當可陶成令器等語臬司爲刑名總匯之區無論何省均關緊要史念祖心地既尚明白若隨同曾國藩遇事講求又加歷練於公事較有裨益著曾國藩飭令張樹聲將直隸積案辦竣即行前赴山西臬司本任史念祖俟接任後仍著曾國藩隨時察看如不能稱職即著據實具奏○壬辰子浙江殉難翰林院編修張洵建祠○癸巳 上詣 大高殿祈雪○甲午諭內閣侍讀學士鍾佩賢奏臬司責任綦重未宜輕授一摺前因曾國藩覆奏直隸臬司史念祖人尚明白可望陶成令器當諭令曾國藩俟該臬司到任後隨時察看於造就人才之中實寓慎重刑名之意茲據鍾佩賢奏稱與其察看於後貽誤已多曷若審擇於前所全不少等語所奏亦不爲無見史念祖著即開缺以原官留於直隸交曾國藩差委俾資學習如能諳練公務即由該督隨時奏聞至所請軍營保至藩臬人員查非科目出身及曾任實缺道府者仍令先補道府察看稱職由該督撫奏明後列單請簡之處著吏部妥議章程具奏○乙未諭軍機大臣等福濟文碩奏俄國請分地界查有望礙情形一摺塔城分界事宜前因布倫托海大臣裁撤改派奎昌於明歲春融時馳往該處會同俄使查勘立界茲覽福濟等摺內所陳窒礙情形不爲無見即著文碩酌帶圖冊卷宗迅即起程趕於明年正月內到京與總理各國事務衙門王大臣詳細面述妥籌辦理文碩起身後該處應行豫辦事宜仍著奎昌恪遵前旨與福濟隨時會商籌辦將此由五百里各諭令知之○九戶部奏飭各省豫撥來年京餉銀七百萬兩內務府經費銀六十萬兩○以錢鼎銘爲直隸按察使由大順廣道遷○丁酉諭內閣慶春奏查明熱河開荒漸侵正園酌擬章程請將查辦遲延之總管等交部議處一摺前因熱河園場地多間曠經前任都統瑞麟

麒慶先後分別科則招佃展墾乃日久展放漫無限制以致侵占正園自應查明禁止所有鑲白旗伊遜川開墾荒地即著照舊有大卡倫爲界其東西佃墾私墾地畝均著飭令一律封禁並著嚴檄該總管等督修卡倫建立紅椿母令任意展墾慶春擬於明歲春融後派原勘各員前往查勘界址按照科則酌予年限以次裁撤並將私墾各戶一律驅逐旗民佃戶領地後陸續侵入山坡溝岔以及領地以多報少各弊出示禁止定以懲罰章程著庫克吉泰到任後詳細參酌妥爲辦理委員員啟章王清經慶春派令前往園場會同總管壽長督催修卡建椿乃任意遲延迄未修整實屬咎無可辭園場總管壽長候補知州員啟章准補喀拉河屯巡檢王清均著交部議處以示懲儆○諭軍機大臣等穆圖善奏馬步官軍剿賊獲勝暨請將同知雷營差遣各摺片善山保一軍在黑茨溝剿賊殲斃甚多追至清水驛附近地方兩路伏賊突起後山保復督隊兜剿該匪敗竄其平番縣屬馬家溝馬賊亦經營總常明等在三岔溝迎戰分路夾擊賊勢不支紛紛敗退仍著左宗棠穆圖善檄飭善山保等偵探賊蹤分路追擊毋任該逆乘隙滋擾牽掣官軍左宗棠擬進駐平涼到省尙需時日即著飭令派出之黃鼎等軍迅速前進以期節節掃蕩痛殄寇氛已革廣東候補知縣續保同知湯柄瓊據穆圖善奏稱甘軍進攻河州需員差遣請予雷營等語湯柄瓊是否請練軍事堪以雷營差遣之處著左宗棠即行查明具奏毋稍遷就將此由五百里各諭令知之○諭金順奏官軍連日進剿情形一摺逆回堅踞王家壩巢穴經金順會同提督張曜督軍進攻破斃賊匪甚多賊圖搶踞長濠又經官軍擊退遂將新築賊壘一律蹋平總兵王連三等復兜剿獲勝賊勢諒已窮蹙惟我軍傷亡亦復不少開挖地道尙未竣工該逆憑牆踞濠卡壘甚多亟應設法攻取著該署將軍會同張曜督飭將弁加意籌攻務將該逆寨速拔以期掃蕩妖氛將此由六百里諭令知之○予甘肅陣亡副將李宏林祭葬世職○是月豁免直隸東明縣被淹被積欠額賦減免兩浙袁浦等三場拋荒田畝上年竈課蠲免安徽無爲等十七州縣暨屯坐各衛被水節年額賦租課蠲緩直隸開州等五十八州縣被水新舊額賦租課倉穀山東濮州等六十七州縣德州等四衛東平所屯莊永阜等二場歉收新舊額賦雜稅竈課湖南澧州等十二州縣暨岳州衛被水新舊額賦租課緩徵兩淮富平等十四場被水竈地新舊錢糧安徽亳州等三十七州縣暨屯坐各衛被水被旱被風被蟲新舊額賦租課

十二月庚子諭軍機大臣等崇實吳棠奏援滇川軍克復魯甸屬城攻破巖崗老巢生擒首逆並檄調唐友耕分兵扼守敘南各摺片滇匪李本忠經川軍擊敗後由板板房桃源一帶分撲良回村寨唐友耕督兵截擊踏毀賊營該逆退守魯甸城內又經官兵擊走收復廳城李本忠逃入巖崗老巢參將尹士超等分路進攻疊破四面碉樓生擒李本忠及賊黨徐添驥

等正法掃蕩嚴密賊巢昭雪漸次肅清此次援滇川軍疊克匪巢生擒要逆勒辦尙屬奮勉在事尤爲出力員弁著崇實等
覈實奏保母許冒濫見在黑石坳回匪勢尙猖獗唐友耕一軍自當乘勝進剿惟總兵全祖凱圍攻之兵未能得手委員孔
昭鈴等亦無抵昭確期即著劉徽昭岑毓英迅飭全祖凱激勵兵勇會同唐友耕相機剿洗一面催令孔昭鈴等馳抵該處
將一切勒撫事宜妥爲籌辦俾東路及早掃蕩毋稍遲延湘果各營散勇見既不遵資遣敘南邊界自應派兵設防以資彈
壓著崇實等檄飭唐友耕酌撥得勝之師前赴鎮雄以顧筠連高拱入川門戶如有潰勇滋事即會同胡中和籌辦至攻克黑
石坳後仍留李家福在滇援剿其唐友耕應否撤回川省之處著崇實等會商劉徽昭岑毓英斟酌辦理將此由五百里各諭
令知之○廣陝西鄉試中額一名○辛丑 上詣 大高殿祈雪○壬寅諭內閣吏部尙書文祥之母秉性淑慎克享遐齡教
子有方俾成良弼今以疾終深堪軫惻朝廷優禮大臣推恩賢母著賜祭一壇賞銀二千兩經理喪事由廣儲司給發靈柩回
旗時沿途地方官妥爲照料以示優眷○兵部右侍郎伊精阿卒予祭葬賞銀三百兩治喪○以寶琦爲兵部右侍郎由內閣學士遷
○劉典回籍養親以蔣志章爲陝西巡撫由四川布政使遷○癸卯諭軍機大臣等蘇鳳文馮子材奏疊克越南夷境賊巢見在併力
圍剿蘇鳳文奏接准越南國王咨文籌辦中外邊界事宜各一摺吳亞終股匪竄入越南邊經官軍跟蹤追剿攻破大慈買市
等處賊巢該匪退踞左洲勢已窮蹙即著馮子材督飭各軍四路圍攻悉數殲滅總期迅速肅功毋稍延緩此次收降人眾馮
子材擬旋師之日儘數帶回內地辦理尙屬得宜惟人數既多則編插非易著該提督隨時給票分起遣送回籍蘇鳳文即飭
各該州縣妥爲安插嚴加約束毋令滋生事端至內地民人私出邊境例禁嚴嚴地方官失察處分亦重蘇鳳文見擬申明定
例檄飭大鎮兩府督屬嚴防並咨越南國王一體稽查即著照所請認真辦理以期日久相安毋得有名無實將此由五百里
各諭令知之○以王德固爲四川布政使由陝西按察使遷○申辰諭軍機大臣等貴州軍務日久未有起色川楚援黔各軍頻年剿
辦敎匪尙能克復城邑追進剿苗巢楚軍敗於黃飄黔軍潰於羊安從此一蹶不復再振皆由各軍無人統攝互相觀望以
致坐糜鉅餉師老無功李鴻章威望素著見在重慶暫駐著即飭赴貴州所有川楚貴州各軍均歸節制該督即逐加揀選
申明賞罰嚴檄各將領分投進剿互爲援應庶得同心協力迅奏膚功備川楚各軍不能得力即行裁撤咨明崇實吳棠劉
峴將此項兵糧仍解赴李鴻章軍營充餉該督上年凱撤之師其中不乏驍勇著即酌量奏調赴黔以備調遣廣西防邊之
兵如須調赴黔省會剿並著李鴻章酌度辦理至李鴻章進兵克復地方後修治城池招集流散聯保甲給籽種仍著曾璧
光隨時商同李鴻章妥爲經理不得以派有督兵大臣即思該卸貴州軍餉奇絀吳棠劉峴務當隨時籌解以資飽騰本日

已有旨令李瀚章署理湖廣總督並令楊昌濬署理浙江巡撫李瀚章著即馳赴湖北將應解餉需源源轉運毋令缺乏此
外協黔各省並著李鴻章曾璧光隨時咨催俾資接濟楊昌濬於接印後揀擇員署理藩司篆務不許存五日京兆之見
稍有廢弛遵義民教各案前據李鴻章奏派道員余恩樞赴黔會辦至今尚未具奏李鴻章見赴貴州即著就近會同曾璧
光迅速持平審結以弭釁端四川西陽教案何以尚未復奏亦著一併迅結毋得稍涉遷延將此由五百里諭知李鴻章崇
實吳棠李瀚章劉峴曾璧光並諭楊昌濬知之○命協辦大學士湖廣總督李鴻章馳赴貴州督辦軍務○以李瀚章署湖
廣總督楊昌濬署浙江巡撫由布政使署○以俊達為江西按察使由奉天奉節○于安徽殉難知縣何薇照布政司理問銜方
茂順等建祠○乙巳諭軍機大臣等部與阿等奏籌展邊荒請緩至明春再行勘辦一摺展邊事宜關涉中外界限非相度
地勢逐處履勘適中定界將來不免轉輾見屆隆冬堅冰積雪一望瀰漫勢難勘丈自係實在情形著照所請緩至來歲春
融再行派委委員前往江岸審度該處情形相機試辦儻有窒礙難行之處即由該將軍等隨時酌覈奏明辦理務期中外
相安永免後患不得稍涉推諉將此各諭令知之○左宗棠奏欽奉諭旨該大臣見擬進駐平涼著將能否馳赴蘭垣情形
迅速具奏等因欽此臣准前署督臣穆圖善咨稱蘭州省垣及西路甘涼肅三郡距涇較遠見雖交卸督篆如關緊要軍務
擬隨時權宜辦理另刊甯夏將軍木質關防鈐用具奏等語比因北路軍情正在剿撫未定之際臣接篆後由涇州前進止
可暫駐平涼布置中路聯絡南路策應北路仍可控制西路若徑駐蘭州設北路逆回被剿橫溢東路不惟劉松山雷正綰
周蘭亭張福齊徐文秀各軍無所稟承即涇平赴蘭州驛道必致阻梗於秦隴大局均有防礙查會垣城關內外及金縣防
兵不下三十餘營近又環掘長壕進攻雖或不足自守似尚有餘臣比咨請穆圖善督同在省司道就見有兵力保衛省垣
又撥過餉銀十七萬兩准穆圖善緘稱軍心大定其地方日行公事責成藩司崇保代折代行遇有緊要之件隨時包封遞
送臣營覈辦見在黃鼎張會元楊世俊崇志馬步各軍分佈隆德靜甯會甯安定一帶蘭垣聲息已通其西遁陝回由狄道
折竄清水驛大營川甘草店者均經各軍擊敗歸巢省城根本之地自期穩固接穆圖善來函從前嫌疑盡釋似與臣尚無
芥蒂臣入平涼以來籌軍食賑灾黎撫良回辦游匪力顧後路轉輸以重中路樞紐見飭即補道蕭守幹總兵黃武賢由蘭
州赴秦望川涼州一帶會同總兵王仁和總理屯政安插石成器一股一俟北路局勢粗定南路裁併各營均有頭緒臣即
當督率親軍鼓行而西為進擣河州之計俟屆時察看情形權衡緩急再將進止機宜詳細奏聞是否如斯伏候訓示又奏
竊陝回西竄經官軍進剿獲勝情形臣已馳報其時提督楊世俊徐占彪馬步各營分防安定紅土窯地方訓陝回自十月

初三日敗遁狄道逆目崔三竄過洮河踞狄西三十里之雅哈川糾河州逆目馬尕大馬占魁馬石等北竄揚言救援金積堡分股結寨隴西屬之固城十家莊蔣家坪乘虛掠食觀隴南路十月十九日二鼓各營募食急進徐占彪步隊循馬家河出固城之西楊世俊馬隊由麻子川出固城之南五鼓齊抵賊巢馬隊張左右翼拒卜家莊蔣家坪援賊步隊直薄堡下賊驚覺憑堡抗敵槍礮對轟楊世俊察看堡牆高聳外環深壕欲圖進攻騎不如步遂令軍士下馬合力攻其西面賊見官軍勢盛悉眾禦之壯士踰壕拊其背探升而上立拔堡城守賊二百餘名無脫免者天明卜家莊蔣家坪援賊盡至不虞官軍已入固城比其漸來漸近官軍從堡中躍馬揮戈而出乘勝猛擊之賊駭而奔各營馬步縱追十八里至春家掌餘逆向西南逸去後收隊回固城休息漏已三下矣是役斃賊八九百名生擒十九名訊出賊目馬文一名斬之官軍傷亡勇丁四名二十日各營自固城回防諜報崔三李經舉禹得彥大股八九千眾由狄道竄踞清水驛甘草店大營川蔓延金家崖楊世俊調集所部馬隊並約徐占彪出紅土窯道員李耀南出馬營監率師合剿二十一日午刻楊世俊徐占彪馬步齊至岷口令各營薄暮傳餐潛師夜起分道襲賊營以火箭爲號行抵車道嶺步隊由中路出甘草店馬隊循車道嶺山脊出清水驛四鼓馬步各路齊抵賊巢號鼓齊鳴甘草店之賊始自夢中驚起叫號亂竄官軍已於月色微茫中槍礮連環轟擊夾以刀矛遇賊卽砍天明追賊入大營川悍賊列隊居前翼蔽羸弱冒死拌拒楊世俊率精騎斜鈔賊後邀其歸路賊返顧慌亂各營馬步乘之踏毀賊巢數十處賊棄輜重器械折由站灘黃石坪遁狄道馬隊跟追五十餘里玉新營水家坡沿途賊屍枕藉日暮乃收隊回大營川就地爲壘戊刻偵東路逆騎數百竄近岷口楊世俊徐占彪於二十三日五鼓整隊東向天明抵岷口賊之步騎已於先夜偷過向狄道西奔矣時李耀南所部亦至各軍分道窮追馬隊沿梓鈎驛疾馳好麥川緊躡賊蹤步隊繼之四路鈔擊竄賊數百一律聚殲得逸出者僅十餘騎而已訊據擒賊何畢梁禹三兒楊文德張九兒供稱此股乃馬生彥之弟馬生定及白彥虎之黨葉曾芷護賊眷西竄緣九月十九日打拉城大敗後避匿荒谷晝伏夜動循郭城驛野蜜川魯家溝繞岷口西原而過不料官軍修至也馬生定葉曾芷已均經官軍陣斬訊畢正法軍前計是役斃賊一千六七百名陝回由狄道而竄圖入河州合夥而河州逆回畏官軍進剿被其連累固拒不納陝回向河回買糧河回故高其價每斗四十斤索價銀四五兩陝回乏食分黨肆掠紅土窯迤西三十里之石家岔王家堡侵及麻子川等處楊世俊派馬隊自紅土窯馳擊李耀南自馬營監派步隊輔之二十九日四鼓各營馬步齊集紅土窯鼓行而西黎明遇賊騎千餘於王家堡副將盛照魁步隊循南原乘高壓下總兵蕭賞謙步隊循西川兜剿而前提督張仲春參將楊德俊馬隊分枝斜鈔賊之左